



هل الله غير عادل لأنه سمح بوراثة الخطية؟

لقاء جديد من سلسلة سؤال محيرنى، الأسئلة الخاصة بالشكوك وقضايا الإلحاد؛ من ضمن الأسئلة اللى جات سؤال بيقول:

السؤال

ان الله غير عادل لأنه سمح بتوارث الخطية، وصاحب السؤال حط مثل من عنده بيقول: دا حتى قانون الدنيا بيقول ان لو أب مديون ومات؛ ولاده مش ملزمين يدفعوا الدين.

أشكرك على اثاره القضية دى لأنها قضية شائكة وأحيانا بتغيظ غير المسيحين ان احنا بنقول ان آدم غلط، فالفساد دخل فى البشرية، وبيعتبروا دا تجنى من الله على الإنسان، لأنه من قبل ما يتولد الإنسان وهو فى فساد، أى محكوم عليه يتولد بالفساد.

تعليق عام على ماورد بالسؤال مع ذكر أمثلة أخرى

مثال

أم عندها الإيدز وتحبل، حسب العلم طفلها لازم هيتولد عنده إيدز، والكلام دا بيمشى على أمراض كثيرة من اللى بيكون فيها الفيروس فى الدم؛ أو بيكون فيه ارتباط بالدم. طب الطفل هنا برئ، بس الأم اللى عملت الخطية أو شايلة المشكلة جابت طفل حامل المشكلة.

المثال المذكور في السؤال

لصاحب السؤال؛ انت لما قلت ان أب كان مديون؛ وبعدين مات؛ فأولاده طالعين مش مديونين!

الحقيقة أولاده مكانوش مديونين حرفياً بمبلغ، هم مولودين شايلين تهمة؛ شايلين غلب، لأن الأب تسبب في مشكلة، يعني عملياً لما أب تبقى سمعته وحشة وهو اللي غلط؛ ولاده مش بالضرورة غلطوا زيه لكن طالعين في المجتمع باصين في الأرض،

فكرة ان أفضل تماماً بين دور الأب والنتائج الواقعة على أولاده، الحقيقة لا إنسانياً ولا عقلياً ولا عملياً الكلام دا مضبوط،

مثال آخر

لما يكون **أب عصبى** جداً، عادة أولاده يبطلعوا عندهم عيوب نفسية، إما عصبين زيه، إما كارهينوه، إما كارهين الدنيا كلها. إذاً هنا ما أقدرش أقول ان عصبيته ما أثرتش على اولاده. الكلام دا حقيقة؛ ودا مرض؛ يعني خطية تبدو عادية؛ لكن سمعت في العيال،

فكرة ان أنا أنفي تماماً امتداد تأثير خطية الأب أو الجد على الأجيال دا فكر نظري.

متى يكون صاحب السؤال معاه حق؟

إنما ما زلت أعلم جيداً ان الشباب بالذات بيتضايقوا جداً من احساس أنا شاييل ذنب ما عملتوش. الكلام دا يبقى مضبوط لو آدم غلط وحضرتك ما بتغلطش؛ يبقى معاك مليون حق تقول ذنبي إيه!

+ إنما إنسانياً وكتابياً هل فينا بنى آدم ما غلظتتش؟ ليه متشعبطين في غلطة آدم ومتهمينه بأن هو أساس المشكلة وكأننا أبرياء لا دور لنا؟

- أمنا حواء غلظت وأبونا آدم غلط، انما احنا كمان زودنا على الغلط جيل ورا جيل ومفيش إنسان بلا خطية؛

"إِنَّ الْجَمِيعَ أَخْطَأُوا وَأَعْوَزَهُمْ مَجْدُ اللَّهِ،" (رو3 : 23)

- ومش احنا اللي دفعنا الثمن، الحقيقة المسيح هو اللي دفع الثمن.

+ أفترض افتراض ساذج وأسأل؛

- لو آدم مغلطش وانت اتولدت، ما كنتش هتغلط؟
- طب ليه بتغلط النهاردة وأنت عارف الصح وعارف الغلط؟
- دا يؤكد ان أنت كمان بتغلط بإرادتك، فبلاش تقول آدم غلط وشربني المشكلة،

القديس اغريغوريوس فى القداش

دا اللى خلى واحد زى القديس اغريغوريوس فى القداش اللى احنا بنصليه؛ ما يقولش آدم خطف لى قضية الموت، لكن يقول أنا بإرادتى اختطفنت لى قضية الموت، يبقى بيتكلم بلسان كل إنسان ولا يُحْمَل آدم كل الخطية.

آدم الجديد دفع التمن

+ قضية أخرى هامة؛

- هنا لو أنت زعلان وصعبان عليك ان آدم وحواء ورثوا البشرية الخطية والفساد! .. ما هو فى المقابل آدم الجديد فتح ايديه بورث البر والأبدية مجاناً لكل تابعيه، يعنى؛
 - هتقول ان أنا اتولدت شايل الدين .. هقولك فيه اللى دفع الدين وبيدى قصاده أضعاف كمان.
 - إذا كان آدم دَخَلَ الخطية والفساد، المسيح خَرَجَ الخطية والفساد.
 - اذا كان آدم دخل الموت، فالمسيح دخل الحياة الأبدية وخرج الموت.
- أنت زعلان ليه! أنت بتاخذ نص القضية ليه؟.

شوف انت عايز تفضل تقول أصل انا بنى آدم .. وتزعل من آدم .. وتقول أصلى مظلوم! ..

مش هتتحرك من مكانك .. ولا تنتمى للمسيح وتفرح باللى عمله ..

ولن تتحرر من الموت أو من الفساد اللى دخل فى طبيعتك وتتمتع بالحياة الأبدية.

وراثه الخطية لا تعطل الخلاص

إذاً وراثه الخطية لا تعطل الخلاص ولا تعطل حرية الإنسان، ليه؟ لأن الإنسان مازال حراً أن يقبل الخلاص؛ يقبل الفداء؛ يقبل التخلص من الطبيعة الفاسدة اللتي دخلت عليه، علشان كده احنا بنتعمد.

بالمعمودية نحمل نعمة المسيح

الإنسان العتيق ينهزم فى المعمودية، ويتولد فينا الإنسان الجديد اللتي على حسب صورة خالقه، فينتصر. علشان كده فى الفكر المسيحي لازم نعلم الأطفال ليه؟

- زى ما الطفل اتولد شايل خطية آدم، نفس الطفل بنعمده علشان يشيل نعمة المسيح،

- هو هنا مالوش ذنب وهنا ما لوش فضل،

- لكن هو كمان فى حياته هيبقى عنده حرية اختيار يمشى ورا آدم ولا يمشى ورا المسيح،

وبالتالى ما نقدرش نلوم ربنا ونقوله ليه خلّيت آدم يورثنا الخطية.

البشرية كلها عجينة واحدة

+ هنا كمان فيه معنى مهم؛ ان البشرية كلها عجينة واحدة، خلية واحدة فى الأصل. ما أحنا منقدرش نخلص من فكرة ان احنا بنى آدمين، فيه امتداد طبيعى، انت مرتبط بوالديك، ووالديك مرتبطين بوالديهم، الخلايا اللتي فى جسمك طالعة منهم والدم اللتي فيك امتداد لهم،

+ ولما نرجع بالحكاية لغاية آدم هنلقى دا الترابط الطبيعى، فالبشرية كلها عيلة واحدة، فالمشكلة ما بتخبطش فى شخص واحد، هي بتخبط فى العيلة كلها .. فى العجينة كلها .. عجينة البشرية،

+ علشان كده فى التسبحة نقول أن عجينة البشرية أخذها المسيح وعملها طبيعة خاصة به فى التجسد، خد عجينة البشرية من أمنا العذرا وصار إنساناً من أجل خلاصنا،

+ يبقى ما نقدرش نقول الحتة دى من العجينة باظت، لأ العجينة كلها باظت، الطبخة كلها باظت، فالبشرية ممثلة فى آدم وحواء أصل الإنسانية تشوهت وبالتالي كل مولود مشوه بالخطية وهيعيش فى الخطية بإرادته، لأنه هيكتر تانى مأساة آدم يوم بعد يوم، مش لأن ربنا حكم عليه يغلط لأ، لأن الإنسان اختار الغلط.

تعبيرات القديس بولس من رومية 5

تعالوا نأكد الكلام دا من تعبيرات القديس بولس، لأنها قضية فلسفية وبولس فيلسوف المسيحية، شرحها في رومية 5 بشكل رائع أوى؛ يقول:

"لأنه إن كنا ونحن أعداء قد صولحنا مع الله بموت ابنه، فبالأولى كثيراً ونحن مصالحون نخلص بحياته!" (روم 5 : 10)

وبعدين يكمل في حته مهمة؛

"من أجل ذلك كأنما بإنسان واحد دخلت الخطية إلى العالم، وبالخطية الموت، وهكذا اجتاز الموت إلى جميع الناس، إذ أخطأ الجميع." (روم 5 : 12)

شوفوا هنا بقى الدقة في التعبير، يعنى بيقول الخطية دخلت بإنسان؛ (آدم وحواء ضمناً لأنهم متجوزين)،

+ وبالخطية الموت، يبقى الموت دخل للإنسان،

+ واجتاز الموت لجميع الناس، دي وراثه الخطية.

+ إذ أخطأ الجميع، (بارادتهم)، دا تأكيد على ان الحرية لم تنزع من الإنسان.

فلما واحد يقول: أنا ذنبى ايه انى اتولدت بخطية آدم؟

الرد: هو أنت مش بتغلط؛ ليه بتأوح؟ الكلام دا لو أنت ما بتغلطش خالص، فمتغاض من خطية آدم، ويا سيدى خطية آدم اتشالت في المعمودية وكل ده كان من غير مجهود بالنسبة لك، لكن أخطأ الجميع دا دورك وارايتك انت.

"فإنه حتى الناموس كانت الخطية في العالم. على أن الخطية لا تحسب إن لم يكن ناموس"

(روم 5 : 13)

+ هو عاوز يناقش فكرة ان الناموس لما دخل؛ ما خلاش الناس تبطل خطية، ما حلش المشكلة،

+ في ناس عاشت قبل موسى كتير (من آدم لموسى دا كذا ألف سنة)، طب ما كانش فيه ناموس؛ ربنا نزل الشريعة؛ هل الشريعة حسمت المشكلة؟ خلصتنا من الخطية؟ لا،

+ الخطية ماشية فى البشر قبل الناموس وبعد الناموس، هو الناموس عمل ايه؟ شخص الخطية، مسك علينا الخطية، وضحتها أكثر، شاور عليها بشكل أوضح، انما ما حلش.

"لَكِنْ قَدْ مَلَكَ الْمَوْتُ مِنْ آدَمَ إِلَى مُوسَى، وَذَلِكَ عَلَى الَّذِينَ لَمْ يُخْطُوا عَلَى سِبْهِ تَعْدِي آدَمَ، الَّذِي هُوَ مِثَالُ الْآتِي." (رو 5 : 14)

+ يعنى اللي بيغلطوا لكن مش بالضرورة نفس عملة آدم، لكن كلهم بيغلطوا، فمن آدم الى موسى، الموت سارى على الكل.

"وَلَكِنْ لَيْسَ كَالْخَطِيئَةِ هَكَذَا أَيْضًا الْهَبَةُ. لِأَنَّهُ إِنْ كَانَ بِخَطِيئَةٍ وَاحِدٍ مَاتَ الْكَثِيرُونَ، فَبِالْأُولَى كَثِيرًا نِعْمَةُ اللَّهِ، وَالْعَطِيَّةُ بِالنِّعْمَةِ الَّتِي بِالْإِنْسَانِ الْوَاحِدِ يَسُوعَ الْمَسِيحِ، قَدْ زِدَادَتْ لِلْكَثِيرِينَ!" (رو 5 : 15)

+ وَلَكِنْ لَيْسَ كَالْخَطِيئَةِ هَكَذَا أَيْضًا الْهَبَةُ:

- يعنى ان كانت الخطية بوظت الدنيا كلها، امال العطية أو الهبة مش قادرة إنها تصلح اللي حصل؟

+ لِأَنَّهُ إِنْ كَانَ بِخَطِيئَةٍ وَاحِدٍ مَاتَ الْكَثِيرُونَ، فَبِالْأُولَى كَثِيرًا نِعْمَةُ اللَّهِ، وَالْعَطِيَّةُ بِالنِّعْمَةِ الَّتِي بِالْإِنْسَانِ الْوَاحِدِ يَسُوعَ الْمَسِيحِ، قَدْ زِدَادَتْ لِلْكَثِيرِينَ:

- هنا الواحد ممكن يتخض ويقول: هو يصح يقول بالإنسان يسوع المسيح؟ طبعاً يصح، هو المسيح لما تجسد كان إنسان كامل؛ إنسان حقيقى، وهنا بيركز على ناسوته أو إنسانيته فى مقابلة مع إنسانية آدم.

- آدم كإنسان؛ كل ابن اتولد منه شاييل الخطية، والمسيح كإنسان كل من يلتصق به ويولد منه، يكتسب النعمة والعطية.

" وَلَيْسَ كَمَا بِوَاحِدٍ قَدْ أَخْطَأَ هَكَذَا الْعَطِيَّةُ. لِأَنَّ الْحُكْمَ مِنْ وَاحِدٍ لِلدَّيْنُونَةِ، وَأَمَّا الْهَبَةُ فَمِنْ جَرَى خَطَايَا كَثِيرَةٍ لِلتَّبْرِيرِ." (رو 5 : 16)

وَلَيْسَ كَمَا بِوَاحِدٍ قَدْ أَخْطَأَ هَكَذَا الْعَطِيَّةُ؛ يعنى العطية أكبر من الخطية؛ يعنى النعمة اللي جاى بيها ربنا تغطى كل اللي حصل وأضعافه، لأن المسيح أقوى وأعظم بحكم لاهوته.

لِأَنَّ الْحُكْمَ مِنْ وَاحِدٍ لِلدَّيْنُونَةِ، يعنى صارت الدينونة على الكل بسبب عملة الواحد الأولانى آدم.

وَأَمَّا الْهَبَةُ فَمِنْ جَرَى خَطَايَا كَثِيرَةٍ لِلتَّبْرِيرِ؛ يعنى المسيح لما جه الدنيا؛ هل كانت مشكلته الوحيدة خطية آدم؟ دا من آدم إلى المسيح، تلال من الخطايا.

" احزاننا حملها واوجاعنا تحملها مجروح من أجل معاصينا مسحوق من أجل آثامنا الذى لم يعرف خطية صار خطية لأجلنا" (اش53:4،5)،

يعنى الشيلة تقلت أوى، إنما العطية تشيل دا كله؛

+ وَأَمَّا الْهَبَةُ فَمِنْ جَرَى خَطَايَا كَثِيرَةٍ لِلتَّبْرِيرِ يعنى هبة المسيح .. تبريره .. وخلصه .. ونعمته، وعطيته، تغطى مش بس عملة آدم، لأ، دا كل الخطايا اللي جت بعد آدم، بيعيد ويزيد لأنها فكرة عميقة وهامة جداً وتخلى المسيحية واضحة، المسيحية مش قانون أخلاقى، المسيحية هى آدم وادم الجديد .. هى اختيار بين عيشة وعيشة .. بين تركة وتركة.

- تركة آدم خطية وموت .. وتركة آدم الجديد حياة أبدية وخلص، فشوف انت عايز ايه!

+ المسيحية هى تمسك بالعطية والنعمة اللي جاى بها المسيح، المسيحية مش واحد مثالى أحسن من كل الناس، لأنه هيفضل يجاهد فى المثاليات، بس الخلاص مجانى من يد المسيح.

"لأنه إن كان بخطية الواحد قد ملك الموت بالواحد، فبالأولى كثيراً الذين ينالون فيض النعمة وعطية البر، سيملكون في الحياة بالواحد يسوع المسيح!" (رو 5 : 17)

+ لأنه إن كان بخطية الواحد قد ملك الموت بالواحد؛

- بسبب عملة آدم، الموت ملك على الكل بسبب الواحد،

+ فبالأولى كثيراً الذين ينالون فيض النعمة وعطية البر، سيملكون في الحياة بالواحد يسوع المسيح،

- يعنى واحد خلى الموت يملك على الكل، لما يجى واحد يملك الحياة للكل، يبقى مش منطقي؟

- بس الواحد دا جدنا الأولانى آدم، غصب عننا بنى آدمين.

- إنما الواحد الجديد (المسيح)؛ مش غصب عننا مسيحيين، لازم نختار. يعنى نبقى مسيحيين تبعه؛ ويملك علينا بالحياة؟ ولا نفضل بنى آدمين وتحت ظل الموت؛ فيملك علينا آدم بالموت؟

"فَإِذَا كَمَا بِخَطِيئَةٍ وَاحِدَةٍ صَارَ الْحُكْمُ إِلَى جَمِيعِ النَّاسِ لِلدَّيْنُونَةِ، هَكَذَا بِبِرِّ وَاحِدٍ صَارَتِ الْهَبَةُ إِلَى جَمِيعِ النَّاسِ، لِتَبْرِيرِ الْحَيَاةِ.
19 لَأَنَّهُ كَمَا بِمَعْصِيَةِ الْإِنْسَانِ الْوَاحِدِ جُعِلَ الْكَثِيرُونَ خُطَاةً، هَكَذَا أَيْضًا بِإِطَاعَةِ الْوَاحِدِ سَيُجْعَلُ الْكَثِيرُونَ أَبْرَارًا." (رو 5 : 18-19)

+ بِمَعْصِيَةِ الْإِنْسَانِ الْوَاحِدِ جُعِلَ الْكَثِيرُونَ خُطَاةً؛ بِمَعْصِيَةِ الْإِنْسَانِ الْوَالِدِ صَارَ كَثِيرُونَ خُطَاةً؛ وَدَى تَوْكِدِ وَرَاثَةِ الْخَطِيئَةِ.
+ بِإِطَاعَةِ الْوَاحِدِ سَيُجْعَلُ الْكَثِيرُونَ أَبْرَارًا بِطَاعَةِ الْإِنْسَانِ الْجَدِيدِ رَبَّنَا يَسُوعَ الَّذِي هُوَ الْأَصْلُ الْجَدِيدُ لِلْبَشَرِيَّةِ .. الْإِنْسَانِ الْكَامِلِ بِحُكْمِ لَاهُوتِهِ، سَيُجْعَلُ الْكَثِيرُونَ أَبْرَارًا.

"وَأَمَّا النَّامُوسُ فَدَخَلَ لِكَيْ تَكْثُرَ الْخَطِيئَةُ. وَلَكِنْ حَيْثُ كَثُرَتِ الْخَطِيئَةُ زِدَادَتِ النَّعْمَةِ جَدًّا." (رو 5 : 20)

يرجع يقول أمال الناموس جه ليه يعنى؟ ان كان الحل بالمسيح مش بالناموس، دخل ليه الناموس فى النص ما بين بداية آدم إلى المسيح كان فى حل جزئى، دخل شريعة موسى أو الناموس، فهنا بولس بيناقش ان الناموس ما حلش المشكلة، الناموس كان بيضبط الإنسان علشان ما يتماداش فى الشر، لكن مش هيعالجه من الخطية ولا الفساد ولا هيرفع عنه حكم الإعدام.

+ وَأَمَّا النَّامُوسُ فَدَخَلَ لِكَيْ تَكْثُرَ الْخَطِيئَةُ هل الناموس دافع للناس تغلط؟ لأ، هو الناموس لما قال: لا تسرق-لا تزنى- لا تشهد بالزور، دا الواحد كان بيغلط وهو مش داريان، فدلوقتي بعد ما كان بيعتبر نفسه غلطان فى واحدة، دا طلع غلطان فى لسته، فدخلة الناموس أكثرت الخطايا.

+ وَلَكِنْ حَيْثُ كَثُرَتِ الْخَطِيئَةُ زِدَادَتِ النَّعْمَةِ جَدًّا يعنى على أد ما طلعت الخطايا كتير أوى، على أد ما نعمة المسيح كبيرة أوى، لأنها غطت دا كله.

"حَتَّى كَمَا مَلَكَتِ الْخَطِيئَةُ فِي الْمَوْتِ، هَكَذَا تَمَلِكُ النَّعْمَةُ بِالْبِرِّ، لِلْحَيَاةِ الْأَبَدِيَّةِ، بِيَسُوعَ الْمَسِيحِ رَبَّنَا" (رو 5 : 21)

النعمة تملك بس بالمسيح، يبقى اللي عايز يتمتع بعهد النعمة؛

- لازم يلتصق بالمسيح .. لازم يبقى مسيحي .. لازم يبقى تابع لربنا يسوع .. لازم ينادى على اسم يسوع .. لازم ياخذ روح المسيح فى المعمودية والميرون .. لازم يعيش حسب وصايا المسيح،

فببقي كده ما تقدرش تقول عليه بنى آدم؛ تقدر تقول عليه مسيحي. كأنه أصبح فيه فرق كبير بين كونه بنى آدم شايل الخطية وبين إنه بقى مسيحي شايل البر اللى اداهوله المسيح.

فهنا المثل اللى جابه الأخ صاحب السؤال إنه قانون الدنيا لما واحد يموت ما يسبش الدين حمل على اللى حواليه. أولاً مش كل قوانين الدنيا بتقول كده، لكن التشبيه دا قاصر لأنه كدا كدا هم مديونين؛ احكى لك قصة من الكتاب تؤكد كده؛

قصة من الكتاب

+ فى حياة الإشع النبى؛ حصل إنه واحد من تلاميذ الأنبياء مات وساب أرملة وولدين؛ وسابهم مديونين، فالمرابى جه عاوز ياخذ الولدين عبيد، فواضح ان الأب لما مات مديون الحكاية ما خلصتتش، يبقى المثل اللى حضرتك حطه مش دقيق؛

- (الست تمثل البشرية والإشع يمثل المسيح). فالبشرية مديونة بعد موت آدم وحواء، واللى بيدفع الثمن كل البشر (كل العيال هتبقى عبيد).

+ فلما راحت الست الطيبة لايشع؛ الإشع حل المشكلة؛

- الإشع اللى يمثل المخلص ربنا يسوع له المجد، حرر ولاد البشرية بالطريقة المعجزية،

ولو انتم فاكيرين المعجزة اللى عملها الإشع كان فيها فكرة الزيت؛ إشارة للروح القدس، اللى هو الحل الجذرى، ان الإنسانية الجديدة تشيل روح الله وتحرر من وراثه الخطية ونعيش كأحرار فى حرية مجد أولاد الله.

هل الإنسان مسير أم مخير؟

السؤال ده يفكرنا بقضية كثير من الشباب بيناقتشوها؛ إنه كون الإنسان بيقول "بالخطايا ولدتنى أم"؛ يبقى الإنسان مسير مش مخير، وكل القضايا التشكيكية بتمت لهذا الموضوع بصلة.

- الله لأنه حب؛ لا يخلق إنسانا مذلولاً يعبده؛ إنما يخلق ابناً يحبه،

- طالما الواحد يبحث فى علاقة حب، لازم يدى حرية للأخر،

- فى علم التربية بنقول؛ يا آباء ادوا حرية لأولادكم علشان يحبوكم،

- لأن الأب لو حرم ابنه من الحرية، الابن هيبقى مجبر على تبعيته بس مش هيبقى مجبر على حبه، مش هيعرف يحب أبوه لأن أبوه حارمه من الحرية.

- الله له المجد أعطى حرية حقيقية للإنسان مش حرية مزيفة، إذاً الإنسان مخير،

فكرة الإنسان المخير واضحة من كمية رفض الله الموجودة في العالم، يعنى لو كان الله موجود والإنسان مسير، ازاي نفسر اللي حاصل في العالم من هذا الفساد والشر والضلمة ورفض الله اللي موجود في الدنيا! دا أب مثالي اللي ساكت على دا كله، إذاً الإنسان 100% مخير.

الإنسان مخير لكن غير مطلق الحرية

+ لكن كلمة مخير لا تعنى أنه مطلق الحرية، كلمة مطلق الحرية لا تناسب طبيعة الإنسان، لأن الإنسان غير مطلق في كيانه،

+ ساعات لما نقول انه مخير، يقول هو أنا اخترت أتولد؟ أيوه ما أنت هنا لأنك إنسان لك حدود، أتولدت، أتوجدت، ما تقدرش تشارك في اختيار ولادتك، إنما بعد ما أتولدت، انت أصبحت عندك مساحة من الحرية، تتناسب مع حدودك.

- انت كإنسان متقدرش تختار انك تعيش 3 شخصيات، أو 3 حيوات في نفس الوقت، معندكش الفرصة دي بحكم حدودك،

- انت كإنسان ما تقدرش تقول طب أنا ناوى أعيش 500 سنة، دي مش من حدودك،

+ طبيعتك البشرية محدودة بقواعد وقوانين، لكن جوه برواز القواعد والقوانين الإنسان حر، بدليل عنده خير وشر، ممكن يمشى مع ربنا أو يرفض ربنا،

- يبقى الإنسان مخير 100% ولكن ليس مطلق الحرية بحكم انه محدود، ولكن الحدود لا تعنى انه مسير،

- وراثه الخطية تعطى حداً للإنسان ولكن لا تقيد حريته،

+ أنا بالخطايا ولدتنى أمى، لكن عندي الحل؛

- ان المسيح له المجد كمان فداني قبل ما أتولد، وأعطاني نعمة الخلاص ممثلة في الأسرار، وأعيش بايمان وحياة مقدسة وهروح السما مش هعيش يتحكم على بالاعدام اللي جابوهولى آدم،

- أنا عندي حرية حقيقية انى أمشى في السكة دي أو أفضل حاطت ايدى على خدى واقول آدم عملها وأنا اللي بدفع الثمن، وأفضل في هذا الفكر المشوش البعيد خالص عن القصد الإلهي.

"افتقد ذنوب الآباء في الأبناء"

دى فى العهد القديم، وبعض اليهود فهموها غلط وربنا حب يصلحها جوه العهد القديم برضه.

دى كلمة فى الشريعة ربنا قالها علشان يخوف اليهود شوية لأن اليهود كان راسهم ناشفة، فقال لهم:

"لَا تَسْجُدْ لَهُنَّ وَلَا تَعْبُدُهُنَّ، لِأَنِّي أَنَا الرَّبُّ إِلَهُ غَيْرٍ، أَفْتَقِدُ ذُنُوبَ الْآبَاءِ فِي الْأَبْنَاءِ وَفِي الْجِيلِ الثَّلَاثِ وَالرَّابِعِ مِنَ الَّذِينَ يُبَغِضُونَنِي،" (تث 5 : 9)

كيف فهمها اليهود؟

اليهود فهموها ان الآباء يغلطوا براحتهم والعيال تطلع من عينهم، طبعاً هذا التفسير يطلع ربنا غير عادل بالمرة، كأنه بَرّاً الكبار وعفاهم من المسئولية؛ ولبس الصغيرين الأبرياء تهمة، فربنا يسوع لقاهم طلغوا بمقولة هم اخترعوها؛

"مَا لَكُمْ أَنْتُمْ تَضْرِبُونَ هَذَا الْمَثَلَ عَلَى أَرْضِ إِسْرَائِيلَ، قَائِلِينَ: الْآبَاءُ أَكَلُوا الْحَصْرَمَ وَأَسْنَانُ الْأَبْنَاءِ ضَرَسَتْ؟" (حز 18 : 2)

زى المثل البلدى؛ يعملوها الكبار ويقعوا فيها الصغار؛ فقال لهم حزقيال: لا تعودوا تقولوا هذا المثل، كل واحد يحمل حمل نفسه؛ الابن لا يهلك بخطية أبوه والاب لا يهلك بخطية ابنه؛

"20 النَّفْسُ الَّتِي تُخْطِئُ هِيَ تَمُوتُ. الْإِبْنُ لَا يَحْمِلُ مِنْ إِثْمِ الْآبِ، وَالْآبُ لَا يَحْمِلُ مِنْ إِثْمِ الْإِبْنِ. بَرُّ الْبَارِّ عَلَيْهِ يَكُونُ، وَشَرُّ الشَّرِّيرِ عَلَيْهِ يَكُونُ" (حز 18 : 20)

قصد الله

فابتدا ربنا يوضح انه ما يقصدش المعنى اللى قالوه، لكن يفتقد ذنوب الآباء فى الأبناء؛ يعنى فيه نوع من وراثة فى الخطية أو استمرار الخطايا فى الأجيال، ليه؟

مثال يوضح قصد الله (قايين)

+ قايين لما بعد عن آدم وبدأ بقتل هابيل ورفض ربنا تماماً، كل الجيل اللى طلع من قايين ما سمعش عن ربنا، ما فيهبوش ريحة ربنا، فدل اسمهم أولاد الناس وبنات الناس وكانوا أشرار جداً،

+ فلما حصل ان نسل شيث أولاد آدم اللى هم شايلىن ربنا وبيعبدوا ربنا وعارفينه؛ اختلطوا ببنات قايين اللى هم بنات الناس وتزوجوا منهم، للأسف أفكار قايين غلبت، فكل الجيل فسد ودا كان بداية الطوفان؛ الطوفان جه لأنه ماعدش حد بي فكر فى ربنا مفيش غير عائلة نوح وقتها؛ هم اللى لسه فيهم رفق،

+ فهنا يؤكد ان قايين لما ربي عياله وتكاثر، كل اللى طلخوا منه مليونين ذنوب هو امتداد طبيعى لتفكير أبوهم، وعلشان كده كانت الإبادة للكل، بحكم ان الذنوب انتقلت من جيل إلى جيل بلا رادع لأنه مفيش حس روى خالص فى الموضوع.

فقضية مخير ومسير يا أحبائى قضية شائكة جداً وبصراحة كده ضميرك هو اللى يحكمها،

- أنت أسأل نفسك وأنت قاعد دلوقتى؛ تقدر تعمل الصح ولا ما تقدرش؟

- تقدر تقوم تصلى ولا ممنوع عليك؟

- هل تقدر ترفع السماعة وتصلح واحد مخلصك ولا لا؟

- هل تقدر تطلع عشورك وأكثر ولا انت ممنوع؟

- تقدر تروح تغلط وتكذب وتؤذى ولا ما تقدرش؟

ضميرك فى اللحظة دى هو اللى يجاوب على هذا السؤال، لأنه مش سؤال فى كتب؛ هو سؤال إنسانى؛ سؤال داخلى، فتلاقى انك بتقول طبعاً أقدر. أنا ممكن أعمل الصح وممكن أعمل الغلط، ان كنت فى لحظة ضعفى بخلط، فأنا فى لحظات كتيرة برفض الغلط، إذا أنت مخير.

فى مثل الابن الضال،

الولد طلع باختياره ورجع باختياره، والكبير رفض يدخل البيت باختياره، والأب هو الممزق والمعذب من هذا الابن الضال وأيضاً الابن المتعجرف، اللى هم فئات البشر المخيرين حتى فى رفض الله.

+إلهنا كل مجد وكرامة إلى الأبد آمين+

Anba Abraam Media

الخدمة محتاجة لكل والكل محتاج الخدمة